



7/2025

KEMENTERIAN PEMBANGUNAN
USAHAWAN DAN KOPERASI

SIARAN MEDIA

KUSKOP BERJAYA LAKSANA 204 PROGRAM, SALUR RM9.58 BILION PEMBIAYAAN SEPANJANG TAHUN LALU: EWON

KUALA LUMPUR, 22 Januari – Kementerian Pembangunan Usahawan dan Koperasi (KUSKOP) berjaya melaksanakan 204 program dan menyalurkan pembiayaan sebanyak RM9.58 bilion sepanjang tahun 2024.

Menterinya Datuk Ewon Benedick berkata, kesemua program yang dilaksanakan itu memberi manfaat hampir 800,000 usahawan, Perusahaan Mikro, Kecil dan Sederhana (PMKS), koperasi, perusahaan sosial, penjaja dan peniaga kecil serta usahawan informal.

Katanya, dari segi pembiayaan pula, seramai 333,653 usahawan dan koperasi mendapat bantuan pembiayaan termasuk pembiayaan mikro-kredit dan geran keusahawanan serta pinjaman mudah melibatkan pembiayaan berjumlah RM9.58 bilion.

“Dalam aspek pembangunan kapasiti dan keupayaan, seramai 132,453 usahawan dan koperasi telah menjalani program pementapan kapasiti serta mendapat fasilitasi dan sokongan keusahawanan yang diperlukan.

“Selain itu, 314,342 individu telah mendapat pendedahan dan pembudayaan keusahawanan, di mana 51,221 daripadanya berjaya bergelar usahawan baharu.

“Daripada aspek perluasan akses pasaran, seramai 4,992 usahawan dan koperasi mendapat akses pasaran merangkumi premis dan ruang perniagaan serta peluang menembusi pasaran domestik dan antarabangsa.

“Manakala 3,562 usahawan dan koperasi telah memperkukuh perniagaan melalui adaptasi teknologi dan penggunaan platform e-dagang,” katanya ketika berucap menyampaikan Amanat Kepada Warga KUSKOP tahun 2025, di Dewan Menara Bank Rakyat, di sini, hari ini.

Turut hadir, Timbalan Menteri Pembangunan Usahawan dan Koperasi, Dato’ Sri Ramanan Ramakrishnan, Ketua Setiausaha KUSKOP, Dato’ Sri Khairul Dzaimie Daud, Timbalan Ketua Setiausaha (Dasar dan Pemantauan) KUSKOP Noor Afifah Abdul Razak, ketua-ketua agensi dan warga kementerian.

Ewon berkata, sepanjang tahun lalu, KUSKOP juga telah melancarkan satu dasar dan dua garis panduan keusahawanan iaitu Dasar Pembangunan Penjaja dan Peniaga Kecil Negara (D3PKN) 2030, Garis Panduan Pelaksanaan Program SDSI Versi 2.0 dan Garis Panduan Aspek Kawal Selia Perniagaan Dari Rumah (Home-Based Business).

Selain itu katanya, Jemaah Menteri pada Disember 2024 telah bersetuju dengan pembangunan Dasar Francais Negara 2030 (DFN 2030) oleh KUSKOP dan dijangka dilancarkan pada Februari 2025.

“Semua ini hasil sokongan seluruh warga KUSKOP serta 10 Agensi. Saya berbangga kerana aspirasi dan prinsip tata kelola yang baik terus menjadi pegangan dan amalan kita semua.

“Ini dapat diterjemahkan berdasarkan pencapaian program-program yang dilaksanakan sepanjang 2024, serta penambahbaikan yang akan dilaksanakan di bawah perancangan tahun 2025.

“Saya percaya *Team KUSKOP is a team that always make it happen,*” katanya.

KEMENTERIAN PEMBANGUNAN USAHAWAN DAN KOPERASI
22 JANUARI 2025